

Headlines

1. औंदे गणतंत्र दिवस शा पैहले जम्मू-श्रीनगर राश्ट्री जरनैली सिडक एन.एच-44 पर सुरक्षा बवस्था गी निग्गर करी दिता गया ऐ।
2. साम्बा च मकामी लोकें आसेया इक संदिग्ध व्यक्ति गी थेहार कन्नै दिक्खे जाने दी सूह थ्होने मगरा तपाशी अभियान चलाया जा रदा ऐ।
3. उत्तरी रेलवे नै नमीं दिल्ली ते कटड़ा बश्कार चलने आली विशेष रेल सेवा गी 11 जनवरी तगर बधाई दिता ऐ।
4. डोडा जिला प्रशासन- सैलसफा मैहकमे कन्नै रलियै 17 ते 18 जनवरी गी भद्रवाह "विंटर फैस्ट 2026" दा आयोजन करोग।
5. जम्मू-कश्मीर च ठंडू दा प्रकोप बरोबर जारी ऐ- केई थाहरें च तापमान च गिरावट दर्ज कीती गई ऐ।

Security-Tightened

औंदे गणतंत्र दिवस आले समारोहें शा पैहले जम्मू-श्रीनगर राश्ट्री शिडक एन.एच-44 पर सुरक्षा बवस्था निग्गर करी दिती गई ऐ। प्रशासन नै जरनैली शिडकै पर बाद्दू नफरी लाने, जांच नाकें स्थापित करने ते गश्त बधाने दे हीलें गी अमल च आहन्नेआ ऐ तां जे गड्डिं दी बवस्थित आओजाई दे कन्नोकन्नी कुसै माड़ी घटना गी बी रोकेआ जाई सकै। इनें हीलें दा मकसद कनून बवस्था दी स्थिति गी बरकरार रखना ते यात्रिं दी सुरक्षा गी यकीनी बनाना ऐ। अधिकारिं मूजब प्रदेश च गणतंत्र दिवस दिं तैयारिं दे इक हिस्से दे तौर पर सुरक्षा बवस्था निग्गर करी दिती गई ऐ।



Search Operation Samba

सुरक्षाबलें अज्ज साम्बा जिले च संदिग्ध नक्लो-हरकत दी टकोहदी सूह थ्होने मगरा जिले च तपाशी अभियान रम्भेया। आकाशवाणी दे जम्मू संवाददाता नै जानकारी दिती ऐ जे एह अभियान उस्सलै शुरु कीता गया- जिस्सलै कटली इलाके च मकामी लोकें आसेया इक संदिग्ध व्यक्ति गी थेहार कन्नै दिक्खेया गया। तोंआई SOG/ पुलस ते सी.आर.पी.एफ दी इक सांझी टीम नै जम्मू शैहरे दे बाहरले इलाके च सिधड़ा कश जंगली इलाके च बी तपाशी अभियान चलाया। एदे इलावा फौज ते पुलस नै जम्मू दे बन्ने आहले इलाकें मीरा-साहब च सांझे तौरा पर गड्डियें दी जांच कीती। एह अभियान सारी रात जारी रेहा ते सुरक्षाबलें इलाके च लंघने आली हर इक गड्डी दा मुआयना कीता।

<><><><><><>

Special Train

उत्तरी रेलवे दे जम्मू डिविजन नै यात्रियें दी बदधी मंग गी दिक्खदे होई नमीं दिल्ली ते श्री माता वैष्णो देवी कटड़ा बश्कार वशेश रेल सेवा 04081/04082 दी सेवा गी बधाने दी घोषणा कीती ऐ। आकाशवाणी दे जम्मू संवाददाता नै जानकारी दिती ऐ जे नमीं दिल्ली थमां कटड़ा लेई रेल नम्बर 04081 अज्ज ते कल चलोग- जिस्सलै के कटड़ा थमां नमां दिल्ली आस्तै ट्रेन नम्बर - 04082 कल ते परसू 11 जनवरी गी चलोग। इस फैसले दा मकसद भीड़ प्रबंधन ते यात्रा गी सुविधाजनक ते सखल्ला बनाना ऐ।

<><><><><><>

SDCM- Award

उत्तरी रेलवे दे जम्मू डिविजन दे सीनियर डिविजनल कमर्शियल मैनेजर उचित सिंगल होरेंगी 2025 बरे दौरान रेलवे च उंदे शानदार कम्म ते समर्पण लेई अति वशिष्ट रेल सेवा पुरुस्कार कन्नै सम्मानित कीता जा रदा ऐ। आकाशवाणी दे जम्मू संवाददाता नै जानकारी दिती ऐ जे उनेंगी एह पुरस्कार 2025 दरान जम्मू रेलवे डिविजन च व्यवसायिक ते यात्री सेवाएं च बेमिसाल सुधार ते नमियां काड्डां आनने लेई दिता जा रदा ऐ।

<><><><><><>

MLA Gym

सरहदी इलाके च नौजवानें दे विकास ते सेहतमंद जीवन गी बढावा देने लेई इक बड्डी गैंह पुट्टेदे होई- हवेली थमां विधायक एजाज़ जान होरें अज्ज पुंछ दे कालेज ग्राउंड च इक GYM दा नींह पत्थर रखेया। तकरीबन 20 लक्ख रपे तगर दी अंदाजन लागत कन्नै बनाए जाने आले इस GYM च मकामी नौजवानें गी खेड्डु गतिविधियें ते कसरत आस्तै इक बेहतर सुविधा उपलब्ध होग। इस कार्यक्रम च बड्डी मती गिनतरी च मकामी बसनीकें- युवा नेताएं- जिला प्रशासन ते कालेजें दे अधिकारियें हिस्सा लैता।



Full Literacy

जम्मू-कश्मीर दे 14 जिले पूरी चाल्ली साक्षरता हासल करी लैती ऐ जेह्डी शिक्षा दे खेत्तर च इक बड्डी छाल ऐ। शिक्षा मंत्री सकीना इत्तू होरें आखेआ ऐ जे बाकी दे जिले जिंदे च बडगाम, कुपवाडा, रियासी, डोडा ते किशतवाड शामिल न- गी बी तौले गै पूरी साक्षरता दा दर्जा हासल होई जाह्ग। उनें आखेआ जे जम्मू-कश्मीर सरकार समाज दे सभनें वर्गे लेई समावेशी ते बरोबरी आहली शिक्षा दे लक्ष्य कन्नै दूर-दरेडे इलाकें च विद्यार्थिं तगर पुज्जने आस्तै प्रौद्योगिकी आधारित पैहलकदमिं दे राएं साक्षरता यकीनी बनाइयै ते स्कूली शिक्षा च सुधार करियै केंद्र शासित प्रदेश च शिक्षा सैक्टर गी मजबूत बनाने लेई बचने-बज्झी दी ऐ।



Bhaderwah Winter Fest

जिला प्रशासन डोडा सैलसफा विभाग कन्नै मिलियै 17 ते 18 जनवरी गी सालाना भद्रवाह “विंटर फैस्टिवल” दा आयोजन करने जा रदा ऐ। इस समारोह च न छडा सैलसफा गी बढावा मिलोग बल्के मकामी युवाएं गी आजीविका दे अवसर बी मिलोग। मीडिया कर्मियें कन्नै गल्ल करदे होई डोडा दे डी.सी. हरविंदर सिंह होरें आखेया जे इस समारोह दे राएं ओह न छडा डोडा दे लोके गी ब्लके पूरे जम्मू-कश्मीर दे लोके गी इक सनेहा देना चाहंदे ना। उनें आखेया जे इस साल इस समारोह गी बर्फबारी दे कारण चिरे शुरु करोआया जा रदा ऐ।



Uniform in Allowance

सरकार नै विशेष सुरक्षा बल दे कर्मियें दे पक्ष च इक्क शुरुआती वर्दी भत्ता ते वार्षिक नवीकरण भत्ते गी मंजूरी दिती ऐ। आकाशवाणी जम्मू दे संवाददाता हुंदी रिपोर्ट मुजब गृह विभाग आसेया जारी किते दे इक आदेश दे मुताबक- विशेष सुरक्षा बल दे सदस्यें गी 20 जहार दा इक्को जेहा भत्ता दिता जाग। एह रकम उनेंगी 6-6 महीने बाद दंऊ किशते च मिलोग। एहदे इलावा इस आदेश च 5 जहार दे सालाना नवीकरण भत्ते आस्तै बी निर्देश दिते गेदे न- जेडे शुरुआती वर्दी भत्ते दी खिरी किशत मिलने दी तारीख दे इक्क बरे मगरा मिलगंन।

<><><><><><>

Jasrotia-Jitender

जसरोटा थमां विधायक राजीव जसरोटिया होर अज्ज केन्द्रीय राज्यमंत्री डाक्टर जितेन्द्र सिंह हुंदे कन्नै नमीं दिल्ली च प्रधानमंत्री दफ्तरै च मिले। उत्थे उनें कठुआ जिले दे जसरोटा हलके च रेल कनैक्टिविटी परियोजनाएं ते सिडकें दे ढांचागत विकास दे विकास बारे गल्लबात कीती। इस बैठक दौरान जसरोटिया होरें हलके दी भलेयां मती जरुरी सहूलतें आस्तै लिखियै दरखास्त किती।

<><><><><><>

Food Safety Ramban

जिला प्रशासन रामबन नै उत्थे सुरक्षित भोजन ते स्वस्थ आहार सरबंध्यै च इक बैठक रक्खी। इस बैठक च रामबन दे डी.सी. मोहम्मद अलयास खान होरें खाद्य सुरक्षा नियमें गी कड़े तरीके कन्नै तोड़ चाढ़ने ते लोकें तगर सुरक्षित ते साफ-सुथरे खान-पान दी उपलब्धता उप्पर जोर भरेया। खाद्य सुरक्षा अधिकारियें गी समें-सर निरिक्षण ते पंजीकरण ते लाईसैसैं -समें-सिर नवीनिकरण बारे जागरुकता अभियान चलाने लेई निर्देशित कीता गया।

<><><><><><>

Weather

जम्मू-कश्मीर च शीत लैहर दे चलदे केंई थाहरें पर अज्ज इस रुतै दा सब्भनें शा घट्ट तापमान दर्ज कीता गया। जम्मू खिते दे केंई इलाकें च रातीं दे तापमान च गिरावट दर्ज कीती गई। जम्मू शैहरे दा घट्टो-घट्ट तापमान 7 इशारिया इक डिग्री सैलसियस दर्ज कीता गया- जिस्सलै के श्रीनगर च घट्टो-घट्ट तापमान मनफी 5 इशारिया इक डिग्री सैलसियस दर्ज कीता गया ऐ। उधमपुर दा तापमान 2 डिग्री सैलसियस रिकार्ड कीता गया ऐ। इस्सै चाली पहलगाम च घट्टो-घट्ट तापमान मनफी 8 इशारिया 6 डिग्री सैलसियस दर्ज कीता गया। मौसम विभाग दा आखना ऐ जे अगले किश दिनें दौरान इस्सै चाली ठंडु दा प्रकोप जारी रौहगा।

<><><><><><>